



Број/Број: **01/2a-50-3-2-28/13**
Сарајево/Sarajevo: 10.1. 2013.

Predmet: Zabilješka sa sastanka predsjedavajućeg Komisije za vanjske poslove Mirze Kušljugića s ambasadorom Srbije u Bosni i Hercegovini Ninoslavom Stojadinovićem

U utorak, 8.1.2013., održan je sastanak predsjedavajućeg Komisije za vanjske poslove Mirze Kušljugića s ambasadorom Srbije u Bosni i Hercegovini Ninoslavom Stojadinovićem.

Na početku sastanka predsjedavajući Komisije za vanjske poslove Mirza Kušljugić poželio je dobrodošlicu gosp. Ninoslavu Stojadinoviću i zahvalio mu na izdvojenom vremenu.

Ambasador Stojadinović izrazio je žaljenje zbog tehničkih problema zbog kojih nisu održani prethodno pripremljeni sastanci s gosp. Kušljugićem.

Mirza Kušljugić kazao je da je on istovremeno predsjedavajući Komisije za vanjske poslove i predsjedavajući Grupe prijateljstva za susjedne zemlje, te ukazao na neku vrstu opredjeljenja naše komisije da je regionalna saradnja jedan od prioriteta koji želimo aktuelizirati u preostalom mandatu. Dodao je da je cilj sastanka koji je tražio da upozna ambasadora Srbije s nedavnim sastankom predsjedavajućih komisija za vanjske poslove zemalja zapadnog Balkana, na kojem su, osim ambasadora Evropske komisije, ambasadora nordijskih i zemalja Beneluksa, baltičkih zemalja i Višegradske grupe, bili prisutni Milorad Pupovac, predsjednik Odbora za vanjsku politiku Hrvatskog sabora, Miodrag Vuković, predsjednik Odbora za vanjsku politiku i evropske integracije Skupštine Crne Gore, i Marija Obradović, zamjenica predsjednika Odbora za vanjsku politiku Narodne skupštine Republike Srbije. On je kazao da je, na inicijativu Odbora za vanjsku politiku Hrvatskog sabora, Komisija za vanjske poslove PDPSBiH prihvatila da četiri komisije, odnosno odbora održavaju redovne sastanke i na osnovu toga uspostave kontinuitet sastanaka između parlamenata, a u funkciji pripreme sastanaka predsjednika parlamenata ili eventualno predstavnika izvršne vlasti, ministara, premijera i predsjednika država.

Gosp. Kušljugić kazao je da je na sastanku u Zagrebu dogovoreno da domaćin sljedećeg sastanka bude Komisija za vanjske poslove PDPSBiH i kao preliminarni termin održavanja sastanka predložio prvu polovinu marta.

Naglasio je da su na sastanku u Zagrebu evidentirane oblasti na kojima treba raditi i da je jedini zaključak koji je na sastanku usvojen taj da bez konsenzusa svih nema proširenja ove grupe zemalja kao i da će na sastanak u Sarajevu biti pozvani samo predsjednici komisija/odbora za vanjsku politiku četiri zemlje (Bosne i Hercegovine, Srbije, Hrvatske i Crne Gore).

Gosp. Kušljugić pozvao je ambasadora Srbije na saradnju u vezi s održavanjem predstojećeg sastanka izrazivši očekivanje da će u naredna dva predsjedavanja doći do konkretnih rješenja i pozitivnih pomaka. Kazao je da je ovo, za razliku od RCC-a i svih drugih inicijativa nevladinih organizacija, naša inicijativa koju mi diktiramo i izrazio očekivanje da ćemo imati i podršku nordijskih zemalja kad dođe do određene faze realizacije.

Dodao je da je jedna od tema koju bismo voljeli istestirati daljnji proces evropskih integracija nakon ulaska Hrvatske u EU, gdje kolege iz Hrvatske imaju konkretne prijedloge, a da je

jedna od naših ideja koju još nismo do kraja testirali, usmjeravanje aktivnosti na poticanje izvršne vlasti da do kraja mandata 2014. godine ratificiramo sporazum o granicama.

Gosp. Kušljugić izrazio je očekivanje da će do kraja prve dekade februara biti dogovoren termin i okvirni program sastanka koji bi trebalo da bude održan u martu. On je još dodao da je na sastanku u Zagrebu dogovoreno da jedan od prioriteta rada bude rješavanje problema običnih ljudi kao što su povrat imovine i ostvarivanje socijalnih prava.

Ambasador Ninoslav Stojadinović kazao je da je njegova ideja također bila da se, na sastancima koji nisu održani zbog tehničkih problema, pokrenu razgovori preko grupa prijateljstva za susjedne zemlje i da se priprema teren za susret dva kolegija parlamenata dvije države i dva predsjednika. Dodao je da se usvajanjem sporazuma između Milorada Dodika i Zlatka Lagumdžije, kojem su se priključile i ostale stranke "šestorke", stvari značajno popravljaju i kazao da bi se u budućnosti mogli organizirati sastanci slični posjeti bivše predsjednice Skupštine Srbije Slavice Đukić-Dejanović i bivšeg predsjednika Srbije Borisa Tadića. Predložio je da slični sastanci budu organizirani tokom ponovnog predsjedavanja PSBiH Denisa Bećirovića i Ognjena Tadića. Što se tiče inicijative o održavanju sastanka predsjedavajućih komisija za vanjske poslove četiri zemlje zapadnog Balkana, kazao je da je ona prihvatljiva i da je slična inicijativa bila i na nivou predsjedništava kada je došlo do zastoja s Turskom.

Mirza Kušljugić kazao je da ovakav format četiri države (BiH, Hrvatska, Srbija i Crna Gora) ima podršku Evropske komisije i da mi lako možemo dobiti podršku Evropskog parlamenta, te da ćemo ići u tom pravcu korak po korak. Ideja je da na sastanku u martu imamo bar dvije konkretne teme, da budu prisutni bar trojica ili četvorica parlamentaraca, ne samo predsjednici komisija, da sastanak traje dan i po i da se napravi uvod i konkretizacija ideje s kojom ćemo ići dalje, dodao je Mirza Kušljugić. Naglasio je da ćemo na sastanke vrlo rado pozvati RCC, Evropsku komisiju i ostale nevladine organizacije ali da mi sami želimo diktirati dinamiku i određivati teme razgovora.

Ambasador Stojadinović kazao je da konstantno imamo problem zbog procedure, da se izbjegava korespondencija s MVP-om i dodao da je najbolje da se zvanične note koje se šalju parlamentima preko MVP-a ujedno šalju i ambasadama, da se ne bi gubile informacije.

Gosp. Kušljugić kazao je da je zainteresiran da Skupština Srbije i Odbor za vanjsku politiku na čijem je čelu gosp. Miloš Aligrudić dobiju informaciju što prije o najavljenim sastancima i izrazio očekivanje u dobru saradnju predsjednika komisija za vanjske poslove četiri zemlje zapadnog Balkana.

PREDSJEDAVJUĆI KOMISIJE

Mirza Kušljugić

Dostavljeno:

- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Kolegiju Predstavničkog doma
- Sektoru za međunarodne odnose i protokol
- a/a